

خطِ دوم پولس بَلِدِه ایمانداری قُرِنْتُس

پیشگفتار

خطِ دوم پولس بَلِدِه جماعتِ ایماندارِ قُرِنْتُس زمانی نوشته شد که رابطه پولس قد ایماندارای امزو جای کلو خراب شد. رابطه پولس و جماعتِ ایماندارِ قُرِنْتُس بخاطرِ کسای خراب شد که خود ره رسُول مُوگفت و رسُول بُودون پولس ره قبول نمُوكد. اونا دَضِدِ پولس تبلیغ مُوكد و بخاطر ازوا بعضی ایماندارای امزو جماعت دَخلافِ پولس باله شد. با وجودِ ازی پولس قد صبر-و-حواله کلو بَلِدِه دَشتنون رابطه خوبتر قد ازوا کوشش مونه و تمام مسئله ره بَلِدِه ازوا روشو و برملاء مُوكنه. دَحین زمان دَباره بخشیدون دیگرو، قُوت یافتو دَحین ضعیفی، اهمیت بخشش سخاوتمندانه و زندگی نو دَوسیله عیسی مسیح تعليیم غوج میدیه.

دَشروع امزی خط، پولس دَباره رابطه خو قد جماعتِ ایماندارِ قُرِنْتُس توره مُوگیه و بیان مونه که چرا جوابِ توهین-و-تحقیرِ مخالفای خو ره سخت میدیه. بعد ازو قد خوشی بیان مونه که توره های سخت شی باعثِ توبه و آشتی شده. اوخته از جماعتِ ایماندارای امزو جای خاھش مونه که تُحفه ها بَلِدِه ایماندارای محتاج که دَ منطقه یهودیه آسته ری کنه. دَفصل های آخر امزی خط پولس از رسُول بُودون

خُو دَ برابِر کسای دِفاع مُونه که خود ره دَ مینکل جماعتِ ایماندارِ قُرِنْتُس رسول
مُوكَفت و رسول بُودون پُولس ره قبُول نَموکد.

فهرستِ عنوانها

- دُعا و سلام (فصل ۱ آیه ۱)
- خُدا مَنبع تمامِ تَسلی ها آسته (۳:۱)
- تغییر دَ سفرِ پُولس (۱۲:۱)
- بخشیدونِ خطاکار (۵:۲)
- خصوصیاتِ خدمتگارای عهدِ نَو (۱۲:۲)
- شکوه-و-جلالِ عهدِ نَو (۷:۳)
- گنج دَ کُوزه های گِلی (۱:۴)
- خانه آسمانی (۱:۵)
- خدمت بَلِدِه آشتی دَدو (۱۱:۵)
- بُت پَرستا و ایماندارا دَ یگ جای سَم نَمییه (۱۴:۶)
- خوشی پُولس (۲:۷)
- تشویق بَلِدِه کومَک و سخاوتمندی (۱:۸)
- وظیفه تیتُس (۱۶:۸)
- جم کدونِ کومَک بَلِدِه ایماندارای اورُشَلیم (۱:۹)
- پُولس از خدمتای خُو دِفاع مُونه (۱:۱۰)
- پُولس و رسولای دروغی (۱:۱۱)

پولس د بله رنج های خو افتخار مونه (۱۶:۱۱)

رویا و مکاشفه پولس (۱:۱۲)

تشویش پولس د باره ایماندارای قرنتس (۱۱:۱۲)

سلام های آخری (۱۱:۱۳)

دُعا و سلام

۱ از طرفِ پُولس که دَ خاست-و-اِرادِه خُدا رُسُولِ عیسیٰ مسیح آسته و از طرفِ پار مو تیموتائوس بَلَدِه جماعتِ ایماندارای خُدا که دَ شارِ قُرْنَتُس آسته و بَلَدِه تمامِ مُقدَّسین که دَ سراسِرِ آخیا آسته: ^۲ فَيَضُّ و سلامتی از طرفِ آته مو خُدا و مَوْلَا عیسیٰ مسیح نصِيب شُمُو شُنَه.

خُدا منبع تمامِ تَسَلّی ها آسته

۳ حمد-و-ثنا دَ خُدا یعنی آته مَوْلَای مو عیسیٰ مسیح که آته رَحْمَت ها و خُدای تمامِ تَسَلّی ها آسته ^۴ که دَ هر رَنْج-و-مُصِبَّتِ مو، دَزِ مو تَسَلّی میدیه تا مو بِتَنِی دِیگِر و ره دَ هر رَنْج-و-مُصِبَّتِی که بَشَه تَسَلّی بَدِی، قد تَسَلّی که خودون مو از جانِبِ خُدا یافته. ^۵ چون دَ اندازه که رَنْج های مسیح دَ وجودِ مو پَرَیمو مُوشَه، دَ امْزُو اندازه تَسَلّی ام دَ وسیله مسیح پَرَیمو دَزِ مو دَده مُوشَه. ^۶ اگه مو دَ رَنْج-و-مُصِبَّتِ آسته، ای بَلَدِه تَسَلّی و نِجات از شُمُو آسته؛ اگه مو تَسَلّی پَیدا مُونَی، ای ام بَلَدِه تَسَلّی از شُمُو آسته که شُمُو دَ وختِ تَحْمُلِ رَنْج های که مو ام مینگری تجربه مُونَید. ^۷ امید مو بَلَدِه شُمُو ثَابِت-و-أَسْتَوار آسته، چون مو میدنی امُورِ رقم که شُمُو دَ رَنْج های مو شَرِيكَ آستَید، امُورِ رقم دَ تَسَلّی مو ام شَرِيكَ مُوشِيد.

۸ آی پِرارو، مو نَمِيَخاهی که شُمُو از رَنْج های که مو دَ ولایتِ آسیا کشیدی، بَه خبر بَشید. مو از حد کَلو زیرِ فِشار بُودی که از تَوان-و-قُدرتِ مو باله بُود، دَ اندازه که مو حتَّی از زِندگی نَمِيَد شُدِی ^۹ و دَ دِلْ خُو احساس مُوكَدی که حُکْمِ مَرَگِ مو إعلان شُدَه. امی چِيزا رُخ دَد تا مو دَ خودون خُو تَوَكُل نَكُنَی، بَلَكِه دَ خُدا تَوَكُل کُنَی که مُردَه ها ره دُوبَاره زِندَه مُونَه. ^{۱۰} او مو ره امْزُو رقم خَطِيرِ مَرَگِ نِجات دَد و نِجات میدیه؛ مو دَزُو امید دَرَی که بعد ازِ ام مو ره نِجات میدیه. ^{۱۱} شُمُو ام قد از مو دَ وسیله دُعاهای خُو کومَك مُونَید تا بَلَدِه فَيَضِّی که از طَرِيقِ دُعا های مردَمَی کَلو دَزِ مو رَسِيَدَه، غَدر کسا بخاطرِ از مو از خُدا شُكْرُگُزاری کُنَه.

تغییر دَ سَفَرِ پُولس

۱۲ افتخارِ ازمو اینی آسته؛ وجдан مو شاهِدی میدیه که مو قد دِلِپاک و إِخْلَاصِ خُدایی دَ دُنيا رفتار کَدَے، نَه دَ مُطابِقِ حِكمَتِ چِسمَانِي، بَلَكِه دَ مُطابِقِ فَيَضِّ خُدا، خُصوصاً دَ برابر از شُمُو. ^{۱۳} چون مو هیچ چِيزی ره دَزِ شُمُو نوشه نَمُونَی بَغَير از چِيزی که شُمُو میخانید و مُوفَامِيد؛ و ما امیدوار آسْتُم که شُمُو تا آخر شَى ره بُفَامِيد، ^{۱۴} امُورِ رقم که

توره مو ره تا اندازه فامیدید، تا د روز آمدون مولا عیسی مو مایه افتخار شمو شُنی، امُو رقم که شمو مایه افتخار ازمو مُوشید.

^{۱۵} قد امزی اطمینان، ما قَصَدْ کدیم که اوَلَ دَپِيشِ ازْشُمو بِيِيمْ تا شُمو دُو دفعه فَيِضْ نصِيبْ شُنِيدْ: ^{۱۶} ما قَصَدْ کدیم که شُمو ره د راهِ خُو دیده دَمَقْدوْنيَه بُورُم و ازْ مَقْدوْنيَه دُوبَارَه دَپِيشِ ازْشُمو بِيِيمْ و شُمو مَرَه كومَك کده سُون يهودیه رَئِي کُنِيدْ. ^{۱۷} آیا وختیکه امی قَصَدْ ره کُدْم، دُودَلَه بُودُم؟ يا قَصَدْ ازْمَه د مُطَابِقِ خاستِ إنسان أَسْتَه که ام «أَرَى، أَرَى» مُوكِيَه و ام «نَه، نَه»؟ ^{۱۸} د وفاداری خُدا قَسَم که توره ازمو قد شُمو ام «أَرَى» و ام «نَه» نَبُودَه. ^{۱۹} چُون باچه خُدا، عیسی مسیح که مو يعني ما و سِلْوانُس و تیمُوتاَتوس دَبارَه اُزو د مینکل شُمو مو عَظَه کدی، دَز شی «أَرَى» و «نَه» نَبُودَ، بلکه دَزُو همیشه «أَرَى» أَسْتَه. ^{۲۰} چُون هر چیقس وعده های خُدا که د وسیله مسیح أَسْتَه، پگ شی «أَرَى» أَسْتَه؛ امزی خاطر أَسْتَه که مو د وسیله اُزو بلده بُزْرَگی-و-جلالِ خُدا «آمِين» مُوكِي. ^{۲۱} مگم امُو که مو ره قد شُمو د مسیح أَسْتَوار مُونَه و مو ره مَسَحَ کده، او خُدا أَسْتَه ^{۲۲} که مُهِرِ مُلکِیَّتِ خُوره د بلَه ازمو زَدَه و روح خُوره د عنوانِ بیعانه د دل های مو دَدَه.

^{۲۳} ما خُدا ره د بلَه خُوشاید میگیرم که دلیل دُوبَارَه نَمَدون مه د قِرْنَش امی بُود که نَخَاستُم شُمو ره سرزنش کُنم. ^{۲۴} مقصد مه ای نَبِيه که مو د بلَه ایمان شُمو حُكمَانی کُنم، بلکه مو همکار شُمو آسْتَه بلده خوشی شُمو، چراکه شُمو د ایمان خُو قایم-و-أَسْتَوار آسْتَید.

^۱ پس د دل خُو تصمیم گرفتم که دیگه قد غَم-و-غُصَّه دَپِيشِ شُمو بِيِيمْ، ^۲ چُون اگه ما شُمو ره غَمَگَی کُنم، کی اَسْتَه که بلده مه خوشی بِدِيه، بَغَير ازْشُمو کسای که د وسیله ازْمَه غَمَگَی شُدِيدْ؟ ^۳ ما امُو خط ره ام نوشتَه کُدْم تا د وختِ آمدون خُو د وسیله کسای غَمَگَی نَشْنُم که باید مَرَه خوش کُنه، چُون ما د بلَه پگ شُمو اِعْتِمَاد دَرُم که خوشی ازْمَه، خوشی پگ شُمو آسْتَه. ^۴ د حَقِيقَت، ما امُو ره قد پریشانی کَلو و غَمِ دل و قد آوَدیده کَلو بلده شُمو نوشتَه کُدْم، نَه بلده ازی که شُمو ره غَمَگَی کُنم، بلکه تا شُمو مُحَبَّت بے اندازه ره بِدَنِيد که ما بلده شُمو دَرُم.

بخشیدون خطاکار

^۵ اگه کُدْم کس از مینکل شُمو باعِثِ غَم-و-غُصَّه مه شُده، او نَه تنها مَرَه، بلکه تا اندازه پگ شُمو ره غَمَگَی کده، اگه مُبالِغَه نَكْنم. ^۶ امُو جَزا که د امُزو آدم د وسیله اکثریَّت شُمو دَدَه شُد، بلده شی بس اَسْتَه. ^۷ پس آلی د عَوَضِ جَزا

ڏدو شُمو باید او ره بُبخشید و دلداری کُنید، نَسْنَه که غَمٰ-وَغْصَه بے اندازه ڪلو او ره غَرَق کُنَه. امری خاطر ڏپیش شُمو زاری مُونُم که مُحَبَّت خُو ره قد اُزو دُوباره برقرار کُنید.^٩ بَلِدِه امزی ام او ره نوشتہ کُدم که شُمو ره آزمایش کُنم تا بِدَنْم که شُمو ڏه چیز فرمانبردار آستَید یا نَه.^{١٠} هر کسی ره که شُمو بُبخشید، ما ام او ره مُوبخشم؛ و چیزی ره که ما بخشیدیم، اگه کُدم چیز ره بخشیدیم، او ره از خاطرِ از شُمو ڏ حُضُورِ مسیح بخشیدیم،^{١١} تا شَیطَو از مو کده پیشِ دستی نَکُنَه، چون مو از نقشه های اُزو بے خبر نیستی.

خصوصیاتِ خدمتگارای عهدِ نَو

^{١٢} وختی ڏ شارِ تروآس بَلِدِه إعلان خوشخبری مسیح آمدُم، يگ درگه ڏ وسیله مولا بَلِدِه خِدمت مه واز شُد،^{١٣} مگم ڏ دِل خُو تیُسُر ره ڏ اونجی پیدا نَکُدم. پس قد ازوا خُدا حافظی کده ڏ مقدونیه آمدُم.

^{١٤} لیکن خُدا ره شُکر که مو ره ڏ وسیله مسیح همیشه ڏ جم پیروزمندا هِدایت مُونه و عَطَرِ شناس خُو ره ڏ وسیله ازمو ڏ هر جای پاش میدیه.^{١٥} چون مو بَلِدِه خُدا عَطَرِ خوشبوی مسیح آستَى ام ڏ مینکلِ نِجات یافته ها و ام ڏ مینکلِ کسای که نابُود مُوشه؛^{١٦} بَلِدِه بعضی ها بُوی مَرَگ که سُون مَرَگ موره و بَلِدِه بعضی ها بُوی زِندگی که سُون زِندگی موره. پس کی لایق امزی خِدمت آستَه؟^{١٧} مو رقمِ کلو کسای دیگه نیستی که کلامِ خُدا ره تُجارت مُوکُنه، بَلِکِه مو قد صداقت و رقمِ کسای که از طرفِ خُدا نَبَی شُدَه ڏ حُضُورِ خُدا ڏ وسیله مسیح توره مُوگَی.

^{١٨} آیا مو بسم ڏ تعريف-و-توصیف خودون خُو شروع مُونی؟ آیا رقم بعضی کسای دیگه ڏ توصیف نامه بَلِدِه شُمو یا از طرفِ از شُمو ضرُورَت دَرَی؟^{١٩} خودون شُمو خط مو آستَید که ڏ دِل های مو نوشتہ شُدَه که ڏ وسیله پگِ مردم ام خانده مُوشه و ام فامِیده. شُمو نشو ڏ دید که شُمو خطِ مسیح و نتیجه خِدمت مو آستَید، که قد سیاسی نوشتہ نَشُدَه، بَلِکِه قد روحِ خُدای زِنده نوشتہ شُدَه، نَه ڏ بَلِه لوح های سنگی، بَلِکِه ڏ بَلِه لوح های دِلِ انسان.

^{٢٠} امي رقمِ اطمینان ره مو ڏ وسیله مسیح ڏ خُدا دَرَی. لیطور نیسته که خودون مو لایق بشی و کُدم چیز ره ادعا کُنَی که بُگی کارِ ازمو آستَه، بَلِکِه لیاقتِ ازمو از طرفِ خُدا آستَه.^{٢١} او ره لیاقت ڏ د تا خدمتگارای عهدِ نَو بشی، نَه عهدی که ڏ بَلِه حرفِ اُستوار آستَه، بَلِکِه ڏ بَلِه روح، چون حرفِ مُوكُشَه ولے روح زِندگی مُوبخشه.

شِکوه-و-جلالِ عهَدِ نَوْ

اگه خِدمتی که نتیجه شی مَرگ بُود و قد حرف د روی سنگا کنده شده د بُزرگی-و-جلالِ رسید، د اندازه که بنی اسرائیل نمیتنست یکسره سُون چهره مُوسی بخاطرِ شِکوه-و-جلالِ چهره شی توخ کنه، باوجوده که او شِکوه-و-جلال از بین رفتنی بود، پس چیقس کلوتر خدمتِ روح د بُزرگی-و-جلال میبیه؟^۹ چون اگه خِدمتی که نتیجه شی محکوم شُدونِ انسان بود بُزرگی-و-جلال داشت، پس خدمتی که باعثِ عادل شُدونِ انسان مُوشه، چیقس کلوتر بُزرگی-و-جلال دَرَه!^{۱۰} دَحِيقَتِ چیزی که سابق بُزرگی-و-جلال داشت، بخاطرِ بُزرگی-و-جلالِ بُزرگتر عهَدِ نَوْ، بُزرگی-و-جلال خُوره از دست دَد.^{۱۱} چون اگه چیزی که از بین رفتنی بود بُزرگی-و-جلال داشت، پس چیزی که دائمی استه چیقس کلوتر بُزرگی-و-جلال دَرَه!

پس، ازی که مو امی رقم امیدَ دری، قد دلیری کلو توره مُوگی،^{۱۲} نَه رقم مُوسی که یگ رُویَبند ره د بَلَه رُوی خُو ایشت تا بنی اسرائیل ختم شُدونِ شِکوه-و-جلالی ره که از بین رفتنی بود، ننگره.^{۱۳} لیکن ذهن های ازوا کور شُد، چون تا امروز وختیکه اونا خاندونِ عهَدِ کُهنه ره میشنوه امُو رُویَبند باقی آسته و باله شُدد، چراکه او تنها د وسیله مسیح از بین موره.^{۱۴} دَحِيقَتِ، تا امروز هر وختیکه اونا تَوراتِ مُوسی ره میخانه، رُویَبند د بَلَه ذهن ازوا قرار میگیره.^{۱۵} مگم وختیکه یگ نفر سُون خُداوند میبیه، امُو رُویَبند از بَلَه ذهن شی پس مُوشه.^{۱۶} خُداوند روح آسته و د جای که روح خُداوند وجود دَرَه، د اونجی آزادی آسته.^{۱۷} و پگ مو قد چهره های بَسِرُویَبند بُزرگی-و-جلالِ خُداوند ره مینگری رقمی که از یگ آینه نمایان شُنه و از یگ جلالِ د جلالِ بُزرگتر تبدیل شده مِثُلِ ازو مُوشی؛ و ای کار از خُداوند سرچشمِ میگیره که روح آسته.

گنج د کُوزه های گِلی

پس بخاطرِ که مو د امزی خِدمت د وسیله رَحْمَتِ خُدا شامل آستی، مو دلسرد نمُوشی.^{۱۸} مو کارای تاشکی شرمآور ره رَد مُوگنی، د جیله-و-مَکر رفتار نَمُونی و کلامِ خُدا ره دِستکاری نَمُونی، بلکه قد بَرَمَلا کدونِ حقیقت مو خودون خُو ره دِجدان هر کس دَحُضُورِ خُدا تعریف-و-توصیف مُونی.^{۱۹} لیکن حتی اگه خوشخبری مو پوشیده یه، او بَلَدِه کسای پوشیده آسته که نابود مُوشه. د باره ازوا گفته میتنی که شیطو حُکمرانِ امزی دُنیا ذهن های امزُو بے ایمانا ره کور کده تا اونا نُورِ خوشخبری ره ننگره، نُورِ خوشخبری ره که جلالِ مسیح آسته و مسیح چهره خُدا.^{۲۰} چون مو د باره خودون خو مو عِظه نَمُونی، بلکه عیسی مسیح ره دِعنوانِ مولا اعلان مُونی و خودون ره

بخاطر عیسیٰ، علام از شمو مُوگی.^۹ چون خدای که گفت: "نور از مینکلِ تریکی روشنی بیدیه،" دل های مو ره روشو کد تا شناخت بُرگی-و-جلالِ خدا ڈچہرہ عیسیٰ مسیح از طریق ازمو روشو تر شنه.

^{۱۰} لیکن امی گنج ره مو ڈکوزه های گلی دَری تا نشو بُدی که تمام امزی قدرت بُرگ از طرفِ خدا آسته نه از مو. ^{۱۱} مو از هر نیگاه د رنج-و-مُصیبَتِ آستی، ولے میده نشده؛ سردرگم آستی، ولے نومید نیستی. ^{۱۲} مو آزار-و-آذیت مینگری، ولے تنها ایله نشده؛ تاہ پورته شده، ولے نابود نشده. ^{۱۳} مو همیشه داغ مرگ عیسیٰ ره ڈجسم خو مُوبِری تا زندگی عیسیٰ ام ڈجسم مو ظاهر شنه. ^{۱۴} چون مو که زنده آستی، دائم بخاطر عیسیٰ ڈمرگ تسلیم مُوشی تا زندگی عیسیٰ ڈجسم از بین رفتئی مو ظاهر شنه. ^{۱۵} پس مرگ ڈ وجود ازمو کار کده زیبی یه، ولے زندگی ڈ وجود از شمو. ^{۱۶} نوشتیه مُقدَّس مُوگه: "ما ایمان داشتم، امزی خاطر توره گفتم." ازی که امروج ایمان نصیب مو شده، مو ام ایمان دَری و امزی خاطر توره مُوگی، ^{۱۷} چون مو میدنی، امرو که مولا عیسیٰ ره از مرگ دُوباره زنده کد، مو ره ام قد عیسیٰ دُوباره زنده مُونه و قد شُمو قتی ڈ حضور خو میره. ^{۱۸} تمام امزی چیزا بخاطر از شمو آسته تا فیضی که بلده مردمای کلوتر و کلوتر میرسه، باعث زیاد شدون شکرگزاری بلده بُرگی-و-جلالِ خدا شنه.

^{۱۹} امزی خاطر مو دلزده نمُوشی. اگرچه جسم مو فرسوده شده موره، مگم باطن مو روز ڈ روز تازه شده موره. ^{۲۰} چون ای رنج-و-مُصیبَت سُبک و زودگذر بلده ازمو شکوه-و-جلالِ آبدی و گرنگ-و-با آرژش ره حاصل مونه. ^{۲۱} پس نظر مو ڈ چیزای نیسته که دیده مُوشه، بلکه ڈ چیزای آسته که دیده نمُوشه، چون چیزای که دیده مُوشه زودگذر آسته، ولے چیزای که دیده نمُوشه آبدی آسته.

خانه آسمانی

^{۲۲} چون مو میدنی، هر وختیکه امی خیمه زمینی که مو دَزشی زندگی مونی چپه شنه، مو یک ساختمان از طرفِ خدا دَری، خانه که قد دستای انسان آباد نشده، بلکه آبدی آسته ڈ عالم باله. ^{۲۳} ازی که ڈ امزی خیمه مو ڈ آه-و-ناله آستی، آرزوی کلو دَری که ڈ وسیلہ خانه آسمانی خو پوشنده شُنی. ^{۲۴} یقیناً وختیکه پوشنده شُنی، مو لچ معلوم نمُوشی. ^{۲۵} چون تا وختیکه مو ڈ امزی خیمه آستی، مو ڈ زیر بار گرنگ آه-و-ناله مونی، چون مو نمیخاهی که کالا ره بُر کُنی، بلکه میخاهی که کالای دیگه بُپوشی تا چیزی که از بین رفتئی آسته ڈ وسیلہ زندگی آبدی قورت شنه. ^{۲۶} امُو که مو ره بلده امزی مقصد آماده کده، خدا آسته که روح الْقُدُس ره ڈ عنوان بیانه ڈز مو ڈده.

^٦ پس مو همیشه خاطرجم آستی؛ اگرچه میدنی تا وختیکه دخانه جسم آستی، مو از مولا دور آستی. ^٧ چون مو د مطابق ایمان زندگی مونی، نه د مطابق دیدو. ^٨ آرے، مو خاطرجم آستی، ولے کلوتر خوش موشی که ای خانه جسم ره ايله کنی و دخانه آسمانی قد مولا بشی. ^٩ پس چی دخانه جسم بشی و چی دور از خانه جسم، مقصد مو امي آسته که مولا ره خوش کنی. ^{١٠} چون پگ مو باید دپیش تخت قضاوت مسيح حاضر شنی تا هر کس مطابق چيزی که د جسم خو انجام دده، چی خوب و چی بد، آجر یا جزا بینگره.

خدمت بلده آشتی ددو

^{١١} پس چون مو میدنی که ترس خدا چی آسته، مو کوشش مونی که دیگه مردم ره وادر کنی. مو بلده خدا کاملاً معلومدار آستی و اميد درم که بلده وجدان ازشمو ام خوب معلومدار بشی. ^{١٢} مو بسم خود ره دپیش ازشمو تعريف-و-تصیف نمونی، بلکه بلده شمو یگ فرصت میدی که دبله ازمو افتخار کنید تا بتنید جواب کسای ره بیدید که دبله چیزای ظاهری افتخار مونه، نه دبله چیزای که د دل آسته. ^{١٣} اگه مو عقل خوره از دست دده، ای بلده خدا آسته؛ و اگه هوشیار آستی، ای بلده ازشمو یه، ^{١٤} چون محبت مسيح دبله مو حاکم آسته و مو د ای نتيجه رسیده که یگ نفر بلده پگ مرد؛ امزی خاطر پگ مرد. ^{١٥} و او بلده پگ مرد تا کسای که زندگی مونه دیگه بلده خودون خو زندگی نکنه، بلکه بلده کسی که بخاطر ازوا مرد و دوباره زنده شد.

^{١٦} پس بعد ازی مو هیچ کس ره د مطابق اصول انسانی قضاوت نمونی، اگرچه یگ زمان مو مسيح ره د مطابق جسم میشنختی، ليکن آلى دیگه او ره د مطابق جسم نمینخشی. ^{١٧} پس اگه کدم کس د مسيح تعلق داشته بشه، او یگ مخلوق نو آسته. چیزای کنه ازین رفت؛ اينه، پگ چیزا نو شده. ^{١٨} تمام امزی چیزا از طرف خدا آسته که مو ره د وسیله مسيح قد خواشتی دد و خدمت آشتی ددو ره دز مو سپرد، ^{١٩} يعني خدا د مسيح بود که مردم دنیا ره قد خواشتی میداد. او خطاهای ازوا ره د حساب ازوا نورد و پيغام آشتی ددو ره دز مو سپرد. ^{٢٠} پس مو از طرف مسيح توره موغی، بطوری که خدا از طریق ازمو درخاست مونه. پس مو از طرف مسيح ازشمو خاهش مونی که قد خدا آشتی کنید. ^{٢١} چون خدا کسی ره که هیچ گناه ره نمیشنخت، بخاطر ازمو قربانی گناه جور کد تاکه مو د وسیله ارو، مردمای عادل جور شنی.

^{٢٢} پس د عنوان همکارا، مو ازشمو خاهش مونی، فيض خدا ره که یافتید بے فایده حساب نکنید. ^{٢٣} چون او موغی:

”دَ وَخْتِ مُنَاسِبٍ دُعَائِي تُو ره شِنِيدُم“

وَ دَ روزِ نِجَاتِ بَلَدِهِ تُو كَوْمَكَ كَدْمٌ.

اینه، امی آلی وختِ مُناسِب آسته و اینه، امی آلی روزِ نِجَات.^۳ موَدِ هیچ کار باعِثِ لخَشیدونِ کس نَمُوشی تا د خِدمت موَعِیب-و-نَقْص پَیدا نَشَنَه،^۴ بلکه دِ عنوانِ خِدمتگارای خُدا موَدِ هر چیز خود ره ثابتِ مُونی: دِ بُرداری کَلو، دِ مُصَبِّبَتِ ها، دِ سختیِ ها، دِ پَریشانیِ ها، دِ قَمچی خوردونا، دِ بَندی شُدُونا، دِ غَیتِ شورِشِ ها، دِ زَحْمت ها، دِ بَسْخاویِ ها، دِ گُشتنگیِ ها، دِ پَاکی، دِ عَلَم، دِ صَبِر-و-حَوْصِلَه، دِ مَهْرَیانی، دِ روحُ الْقُدْس، دِ مُحَبَّتِ خالص، دِ گُفتونِ حَقِيقَت و دِ نِشو دَدَنْ قُدرَتِ خُدا، دِ وسِيلَه سَلاَح عدالت دِ دِسْتِ چَپ و راست، دِ غَيَتِ احْتِرام و بَسْ احْتِرامی، دِ غَيَتِ بَدَنَامِي و نِيكَانِامي. رقمِ فَريِيكارا قد ازمو رفتارِ مُوشَه، ولے موراستگویِ آستَى؛ رقمی که ناشِخته بشَى، ولے شِنَخته شُدَه آستَى؛ رقمی که دِ مُردو بشَى، ولے اينه، موَزَنَه آستَى؛ رقمی که جَرا دیده بشَى، ولے كُشته شُدَه؛^۵ رقمی که غَمگی بشَى، ولے هميشه خوشی مُونی؛ رقمی که غَرِيب بشَى، ولے غَدرِ كسا ره دَولَتمَندِ مُونی؛ رقمی که هیچ چیز نَدَشَته بشَى، ولے صاحِبِ تمامِ چیز آستَى.

آی مردُمَای قُرْنَشَس، مو بَسْ پَرَده قد شُمَو توره گُفتَى و دِلِهای مو بَلَدِه شُمَو پِراخ آستَه.^۶ بلده شُمَو هیچ تَنگَى دِلِ ازمو نِيسَتَه، ليکِنْ تَنگَى دِلِ ازشُمَو آستَه.^۷ ما قد شُمَو رقمِ بچِكِچای خُو توره مُوگُم: رقمِ ازمو شُمَو ام دِل های خُو ره پِراخ كُنِيد.

بُتِ پَرِستا و ايماندارا دِ يَگِ جَاي سَمِ نَمَيِيه

قد بَسْ ايمانا دِ زَيرِ يَگِ يُوغِ يِكَجَاي نَشَنِيد، چُون بَيَنِ عدالت و شرارَتِ چَى شِراكَت وجود دَرَه؟ يا بَيَنِ نُور و تِرِيكِي چَى رفاقت؟^۸ بَيَنِ مسيح و بِليعالِ چَى تَوَافُق وجود دَرَه؟ يا يَگِ ايماندار قد بَسْ ايمانِ چَى مُناسِبَتِ دَرَه؟^۹ يا بَيَنِ خانِه خُدا و بُتِه چَى إتفاق وجود دَرَه؟ چُون مو خانِه خُداي زِنَدَه آستَى. امُو رقمِ که خُدا مُوگِيه:

”ما دِ بَيَنِ ازوا زِندَگَى مُونُم و دِ مِينَكِلِ ازوا حَرَكَت مُونُم؛“

ما خُدَاءِ ازوا مُوشَم

و أونا قَومَ مه مُوشَه.“

^{۱۷} امزي خاطر خُداوند مُوگيه:

”از مينکلِ ازوا بُر شنيد

و ازوا جدا بشيند

و دَ هيچ چيز ناپاک دِست نَزَنيد؛

اوخته ما شُمو ره قبُول مُؤْنم

^{۱۸} و ما آته شُمو مُوشِم

و شُمو باچه ها و دُخترون مه مُوشِيد.“

ای ره خُداوند قادرِ مطلق مُوگيه.

^{۱۹} پس آی عزيزا، ازى كه امى وعده ها ره دَرى، بىيد كه خودون ره از هر ناپاکى جسم و روح پاک كُنى و
قدوسىت خُوره قد خُداترسى كامل كُنى.

خوشى پولس

^{۲۰} مو ره دَ دِل هاي خُورجاي بِدِيد. مو دَ حق هيچ كس بدِي نَكَدَه، هيچ كس ره فاسِد جور نَكَدَه و هيچ كس ره ڈوپه
نَكَدَه. ^{۲۱} ما اى ره نَمُوگم تا شُمو ره محکوم كُنم، چون بِيش ازى گُفشم كه شُمو دَ دِل هاي مو جاي دَريد، دَ اندازِ
كه مو حاضرِ آستي قد شُمو قتى بُمرى و قتى زِندگى كُنى. ^{۲۲} ما دَ بَلَه شُمو غَدرِ اعتِماد دَرم و ام دَ بَلَه شُمو کلو
افتخارِ مُونم. ما تَسلَّى كامل پيدا كديم؛ دَ هر مُصيبيت كه دَ بَلَه مو مييه، ما بِي اندازه خوشحال آستم.

^{۲۳} چون وختيکه مو دَ مقدونيه رسيدى، جسم مو دَ ماراسى نَتَتِست، بلکه مو از هر سُو دَ مُصيبيت گِرفتار شُدَى؛ دَ بُرونِ
جسم خُو گِرفتارِ جنگ-و-جنجال بُودى و دَ درُون خُو ترس دَشتى. ^{۲۴} مگم خُدai كه مردمای دلميده ره تَسلَّى ميديه،
مو ره دَ وسِيله آمدونِ تِيسَّس تَسلَّى دَد. ^{۲۵} نَه تنها دَ وسِيله آمدونِ ازو، بلکه امچنان دَ وسِيله تَسلَّى كه او از شُمو

يافته بود. چون او مو ره د باره شوق شمو، د باره غمگيني شمو و د باره غيرت شمو که د باره ازمه دريد خبر داد که کلوتر خوشحال شدم.

^١ چون حتی اگه د وسیله خط خو شمو ره غمگی کدم، از نوشتیه شی پشیمو نیستم. اگرچه تا اندازه پشیمو شدم، چون دیدم که قد امزرو خط شمو ره غمگی کدم. ^٢ لیکن آلی خوشحال آستم، نه بخاطر که شمو غمگی شدید، بلکه بخاطر که غمگینی شمو باعث توبه کدون شمو شد. شمو مطابق خاست-و-اراده خدا غمگی شدید تا د وسیله ازمو از هیچ طریق دز شمو ضرر نرسه. ^٣ غمی که مطابق خاست-و-اراده خدا یه، انسان ره سون توبه موبیره و باعث نجات شی موشه و هیچ پشیمانی نداره؛ مگم غمی که از دنیا آسته، باعث مرگ موشه. ^٤ توخ کنید، امی غم که مطابق خاست-و-اراده خدا بود، چی کوشش-و-تلاشی ره د زندگی شمو د وجود آورده، چی سور-و-شوقی تا خودون ره بے گناه ثابت کنید، چی خشمی، چی احساسی ترسی، چی دلتنگی، چی غیرتی و چی مجازاتی بلده امزرو خطاکار! شمو از هر نگاه خودون ره د ای قضیه بے گناه ثابت کدید. ^٥ پس اگرچه امرو خط ره دز شمو نوشه کدم، او بخاطر کسی نبود که بدی کد، نه ام بخاطر کسی که د حق شی بدی شد، بلکه بخاطر ازی بود که غیرت شمو د باره ازمو د حضور خدا د خودون شمو معلومدار شنه. ^٦ د وسیله امزی چیزا مو تسلی پیدا کدی.

علاوه از تسلی خودون مو، مو از خوشی تیپس بے اندازه خوش شدی، چراکه روح-و-روان شی د وسیله پگ شمو آرامی پیدا کدد. ^٧ چون اگه ما د پیش تیپس د بلله شمو افتخار کدم، ما شرمنده شدم، بلکه امرو رقم که مو هر چیز ره دز شمو گفتی حقیقت بود، امرو رقم افتخار کدون مو د پیش تیپس ام راست ثابت شد. ^٨ آلی دل ازو دیگه ام کلوتر سون شمو نزدیک شده، چراکه او اطاعت پگ شمو ره د یاد خو میره که شمو چی رقم قد ترس-و-لرز ازو پذیرایی کدید. ^٩ ما خوشحال آستم که د هر چیز د بلله شمو اعتماد کامل درم.

تشویق بلده کومک و سخاوتمندی

^١ آی براوو، مو میخاهی که شمو د باره فیض خدا که بلده جماعت های مقدونیه دده شده، خبر شنید. اگرچه اونا د آزمایش سخت رنج-و-مُصیبَت گرفتار بود، خوشی پرمون ازوا و غریبی بے اندازه ازوا اونا ره از دولت سخاوتمندی لبریز کد. ^٢ ما شاهد آستم که اونا مطابق توان خو و حتی کلوتر از توان خو داوطلبانه کومک دد. ^٣ اونا قد سور-و-شوقی کلو از مو خاھش کد که فرصت شریک شدو د امزی خدمت که بلده مقدسین آسته، دزوا ام دده شنه. ^٤ و ای کار ازوا کلوتر از توقع ازمو بود: اونا خودون ره اوّل د مولا تسلیم کد و بعد ازو مطابق خاست-و-اراده

خُدا، دَزِ مو.^٩ امزي خاطر مو از تيُسْ خاهِش کدي که اى کارِ سخاوتمندانه ره امو رقم که دَ مينکل شُمو شروع کُدد، امو رقم او ره دَ آخر بِرسنه.^{١٠} پس امو رقم که شُمو دَ هر چيز پيشي مِيگيريد، يعني دَ ايمان، دَ توره گُفتوا، دَ عِلم، دَ شور-و-شوقِ کلو و دَ مُحبَتى که بلده ازمو درِيد، امو رقم دَ امزي کارِ سخاوتمندانه ام پيشي بِكيريد.^{١١} ما اى ره بِحَيثِ يگ حُكم نَمُوكُم، بلکه خالص بُودون مُحبَت شُمو ره دَ برابر کوشش-و-تلash دِيگرو آزمایش مُونم.^{١٢} چون شُمو فيضِ مولاي مو عيسى مسيح ره مِيدَنيد که اگرچه او دَولتمَند بُود، ولے بخاطرِ ازشُمو خود ره غريب کد تا دَ وسیله غريبي ازو شُمو دَولتمَند شُنيد.^{١٣} دَ امزي باره ما نظر خُوره مُوكِم، چون اى دَ فايده شُمو آسته: يگ سال پيش نَه تنها شُمو دَفعه اوّل امي کارِ سخاوتمندانه ره شروع کدید، بلکه خاست-و-إراده انعام دَدون شى ره ام دَشتيد.

^{١٤} پس آلى امو کار ره انعام دَده دَ آخر بِرسنه تا امو رقم که شور-و-شوق دَ خاست-و-إراده شُمو آسته، امو رقم دَ مُطابيقِ وَس-و-تَوان خُوتكميل کُنيد.^{١٥} چون اگه شور-و-شوق بشه، کومکِ يگ نفر مُطابيقِ چيزی که دَره قبُول مُوشه، نَه مُطابيقِ چيزی که نَدره.^{١٦} مقصد مه اى نِيسته که دِيگرو آسوده بشه و شُمو زير فِشار بشيد، بلکه مو ميخاهي که يگ برابری دَ وجود بييه^{١٧} تا داريبي پِريمون ازشُمو ضرورت ازوا ره پُوره کنه و تا داريبي پِريمون ازوا د آينده ضرورت ازشُمو ره پُوره کنه. دَ امزي رقم برابری دَ وجود مييه.^{١٨} امو رقم که دَكتاب مُقدس نِوشه شُده:
”کسي که کلو جم کد، إضافه نَدشت و کسي که کم جم کد، کمبود نَدشت.“

وظيفه تيُس

^{١٩} خُدا ره شُكر که دَ دِلِ تيُس امو شور-و-شوق ره جاي دَد که ما بلده شُمو دَرم.^{٢٠} چون او نَه تنها خاهِش مو ره قبُول کد، بلکه کلوتر شوق پيدا کده که دَ رضای خود خُور دَپيش شُمو بييه.^{٢١} و مو قد ازو قتی امو بِرار ره رَئي مُونی که دَ مينکل تمام جماعت هاي ايماندارا بخاطرِ اعلان کدون خوشخبری از شى تعريف-و-توصيف مُوشه.
^{٢٢} علاوه اзи، او دَ وسیله جماعت هاي ايماندارا ام انتخاب شُده تا دَ انعام امزي کارِ سخاوتمندانه قد ازمو همسَر بشه که مو اى خدمت ره بلده بُزرگي-و-جلالِ مولا و از رُوي شور-و-شوق انعام ميدى.^{٢٣} مو احتياط مُونی که هيج کس مو ره دَ باره امزي هديه سخاوتمندانه که مو دَ خدمت شى آستي، ملامت نَکنه،^{٢٤} چون مو کوشش مُونی چيزی ره انعام بِدي که نَه تنها دَ نظرِ مولا، بلکه دَ نظرِ مردم ام دُرست آسته.^{٢٥} قد ازوا قتی مو يگ بِرار دِيگه خُوره رَئي مُونی که بارها او ره آزمایش کدے و دَکلو کارا شور-و-شوق شى ثابت شُده و آلى بخاطرِ اعتماد کلو که دَ بلده ازشُمو دَره، شور-و-شوق شى دِيگه ام کلو شُده.^{٢٦} دَ باره تيُس: او بلده خدمت شُمو رفيق و همكار مه آسته. دَ

باره بِرارون دِیگه: اُونا قاصدای جماعت های ایماندارا آسته بلده بُزرگی-و-جلال مسیح.^{۲۴} پس ثبوتِ محبَّت خُوره و دلیلِ افتخاری ره که موَدَّبله شُموَّ دَری، دَپیشِ رُوی جماعت های ایماندار بَرَملا نشو بَدید.

جَمْ كَدوْنِ كَوْمَكْ بَلَدِه اِيمانداري اوْرُشَليْم

^۱ لازِم نیسيه که دَباره امزی خدمتِ كومک رسانی که بلده مُقدَّسین انجام دَده مُوشَه دَز شُمو يَگو چيز نوشتَه كُنم،
^۲ چون ما شور-و-شوق شُمو ره بلده كومک کدو میدَنُم که ما په افتخار مه دَباره از شُمو دَپیشِ ایماندارای مَقدونیه آسته و دَزوا گفتیم که ایماندارای آخیا از یگ سال پیش آماده كومک آسته؛ و غیرت از شُمو اکثريتِ ازوا ره دَشور-و-شوق آورده. ولے بِرارو ره رَبِّي مُؤمَّن تا افتخار موَدَّبله شُموَّ دَری باره پُوچ-و-باطل ثابت نَشنه، بلکه تا امو رقْم که گفتیم، شُمو آماده بَشید.^۳ دَغَيرِ ازِي، اگه کُدم کس از ایماندارای مَقدونیه قد ازمه بييه و بِنگره که شُمو آماده نیستید، اوخته نَه تنها شُمو، بلکه مو ام که قد اعتماد دَبله شُمو افتخار مُوكدي، شرمِنده مُوشَه. پس فِكر کُدم لازِم آسته که از بِرارو خاهِش کُنم تا اُونا پيشلو دَدیر شُمو بييه و هدیه سخاوتمندانه ره که شُمو وعده کده بُودید، پیش از پیش آماده کُنه تا اُو یگ هدیه داوطلبانه بَشه، نَه یگ هدیه که از رُوي مجبوري دَده مُوشَه.

^۴ مقصَد ايني آسته: هر کسی که کم کِشت کُنه، کم درَو مُونه و هر کسی که کلو کِشت کُنه، کلو درَو مُونه. پس هر کس امُوقس بِديه که دَلِّ حُو قصد کده، نَه از رُوي بَيِّنيلی يا مجبوري، چون خُدا کسی ره دوست دَره که دَخشى بخشش مُونه.^۵ و خُدا مِيتنه که هر برَكت ره بلده شُمو پَريمو کُنه تا هر وخت از هر چيز دَاندازه ضرورَت دَشته بَشید و دَهر کارِ نيك کلو حِصَه بِكِيريد. امو رقم که دَكتابِ مُقدَّس نوشتَه شَده:

”أَوْ بَخْشَ كَدَه دَغَربِيا مِيدِيه؛

نيکي ازو تا آبَد باقى مُونه.“

^۶ امو که تُخَم ره بلده کِشت کُننده و نان ره بلده خورِنده آماده مُونه، بلده از شُمو ام تُخَم ره آماده کده کلو مُونه و حاصلِ کاري عادلَنَه شُمو ره پَريمو مُونه.^۷ شُمو از هر نِگاه دولتمَند مُوشِيد تا بِتَنِيد دَهر زمان سخاوتمند بَشید که سخاوتمندي شُمو دَسِيله ازمو باعث شُكْرگُزاری از خُدا مُوشَه،^۸ چون انعام امزى خدمت نَه تنها ضرورَت های مُقدَّسین ره پُوره مُونه، بلکه شُكْرگُزاری از خُدا ره ام عَدَر کلو مُونه.^۹ از طِریقِ تصدِيقِ امزى خدمت اُونا خُدا ره بُزرگي-و-جلال میدَيَه، بخاطرِ إطاعت شُمو و إقرار شُمو دَخوشخبری مسیح و بخاطرِ بخششِ سخاوتمندانه شُمو

که دَزْوا و دِيگرو مِيدِيد. ^{١٤} اونا د آرزوی دیدون شُمو آسته و بخاطر فَيَضِّ بَعْدَ اندازه خُدا که نصِيب شُمو شُده، بَلَدِه شُمو دُعا مُوكُنه. ^{١٥} خُدا ره بَلَدِه تُحِفَه تَوْصِيفِناپِذِير شی شُكْر-و-سِپاس باد!

پُولُس از خِدمَتَنَای خُو دِفاع مُونَه

١٠ ^١ ما پُولُس د وسِيله فروتنى و مُلايمِت مسيح از شُمو خاهِش مُونُم، ما کسى که د گُفتَه بعضى هاي شُمو د پيش رُوي شُمو عاچِر آستم، ولے دُور از شُمو باجِرات. ^٢ ما د پيش شُمو زاري مُونُم که وختى ما حاضِر مُوشِّم مجُبور نشُنم که دليري نِشو بِدِيْم و جُرات کده قد کسای مُخالفَت کُنم که فِكِر مُونَه مو مُطابِقِ راه-و-رَسِّم جسم رفتار مُونَى. ^٣ اگرچه مو د جسم زِندگى مُونَى، ليکن مُطابِقِ راه-و-رَسِّم جسم جنگ نَمُونَى؛ ^٤ چون سلاح هاي جنگى مو جسمانى نَيَّبه، بلکه قدرتِ اللهِي دَزْوا وجود دَرَه تا قلعه ها ره چَپَه کُنه. ^٥ مو خيالات و شاخاي كِبر ره که د ضِدِ شِناختِ خُدا باله شُنه از بَيَن مُوبِرى و هر فِكِر ره اسِير مُونَى تا از مسيح إطاعتَتْ کُنه. ^٦ مو آماده آستي که هر ناِطاعَتِي ره جزا بِدِي، ولے مُنتظِر آستي که إطاعتِ از شُمو كامل شُنه.

٧ شُمو د ظاهِرِ چيزا توخ مُونَيد. اگه کسى د بَلَه خُو اطمِينان دَرَه که د مسيح تعلق دَرَه، اي ره د ياد خُو دَشته بشَه که امُورِ رقم که او د مسيح تعلق دَرَه، امُورِ رقم مو ام د مسيح تعلق دَرَه. ^٨ حتَّى اگه کم وَرَى از حد کلوَتَر د بارِه اختياراتي که دَز مو دَدَه شُدَّه إفتخار کُنم، د بارِه اختياراتي که مَولا بلده آبادي شُمو دَز مو دَدَه نَه بلده تباهاي شُمو، شرمنده نَمُوشُم. ^٩ ما نَمِيَخَايِم که اي طور معلوم شُنه که ما د وسِيله خط هاي خُو شُمو ره مِيتَرسُنم. ^{١٠} چون اونا مُوگيه: "خط هاي ازُو گِرنگ و قَوَى آسته، ولے حُضُور جسمى شى ضعيف و توراي شى ايلمهي." ^{١١} امى رقم مردُما باید بَدَنه، چيزى که مو پُشتِ سر د وسِيله خط مُوگى، وختيکه حاضِر شُنى انجام ام مِيدِي.

١٢ مو جُرات نَمُونَى که خود ره از جُمله کسای حِساب کُنى يا قد کسای برابر کُنى که اونا خودون ره تعريف-و-تَوْصِيف مُونَه، ليکن وختيکه اونا خودون ره قد خودون خُو اندازه مُونَه و قد خودون خُو برابر مُونَه، نِشو مِيدِيد که از فامِيدگي برخوردار نِيَسته. ^{١٣} ليکن مو از اندازه کلو إفتخار نَمُونَى، بلکه د اندازه ساحِه که خُدا بلده مو تعبيين کده إفتخار مُونَى که اي ساحه شُمو ره ام دَرَرَ مِيگيره. ^{١٤} مو از حد خُو بالهَتَر پاي نَه ايشتَسَه، مِثَلِ که بُگَي هرگز د پيش شُمو نَمَدَه بشَه، چون مو اوَلين کسای بُودِي که قد خوشخبرى مسيح د پيش از شُمو ام رسِيدِي. ^{١٥} مو از اندازه کلو إفتخار نَمُونَى که کار-و-زَحْمتِ دِيگرو ره از خود حِساب کنى، بلکه اميد دَرَه که وختى ايمان شُمو رُشد کُنه، ساحِه خِدمَت مو د مينكل شُمو وَسِيعَتَر شُنه، ^{١٦} تا مو بَيَتَنَى خوشخبرى ره د سرزمينيَّاتِ دُورَتَر از شُمو إعلان کُنى و د بارِه

کاری که د ساچه خدمت دیگه کس گاه انجام شده، افتخار نکنی.^{۱۷} چون نوشه یه: "هر کسی که افتخار مونه، د بله خداوند افتخار کنه."^{۱۸} چون کسی که خود ره تعریف و توصیف مونه تایید نموشه، بلکه کسی ره که مولا تعزیف و توصیف مونه او تایید نموشه.

پولس و رسولای دروغی

۱۹ ^{۱۹} امیدوار آستم که مره قد کم وری لودگی مه تحمل کنید، د حقیقت آلی ام مره تحمل مونید. ما د باره شمو غیرت درم، غیرت الهی، چون شمو ره دیگ شوی نامزاد کدم، یعنی د مسیح، تا شمو ره بحیث یگ دختر خانه پاکدامو دزو تقدیم کنم. ^{۲۰} لیکن ترس مخورم که امو رقم که مار د وسیله حیله و مکر خوا ره بازی دد، امو رقم فکرای شمو ام از صداقت و اخلاصی که د مسیح درید، گمراه شنه.^{۲۱} چون اگه کدم کس بیمه و د باره یگ عیسای دیگه اعلان کنه بغیر از عیسای که مو دز شمو اعلان کدی، یا شمو یگ روح دیگه ره قبول کنید بغیر از روحی که یافتید یا یگ خوشخبری دیگه ره قبول کنید بغیر از خوشخبری که گاه قبول کدید، شمو او ره د آسانی تحمل مونید.

^{۲۲} ما فکر نمونم که ما امزو رسولای فوق العاده کده کمتر بشم.^{۲۳} شاید ما یگ توره گوی خوب نبشم، ولے د علم کم نیم، بلکه از هر نگاه و د هر چیز مو ای ره بلده شمو ثابت کدی.^{۲۴} آیا ما گناه کدم که خود ره خار و حقیر کدم تا شمو سریند شنید وختیکه خوشخبری خدا ره مفت بلده شمو اعلان کدم؟^{۲۵} ما دیگه جماعت های ایماندارا ره قد گرفتون کومک غارت کدم تا شمو ره خدمت کنم.^{۲۶} و غیتیکه قد از شمو بودم و دیگو چیز ضرورت داشتم، بار دوش هیچ کس نشدم، چون بارونی که از مقدونیه آمد، ضرورت های مره پوره کد. پس ما نهایشتم و د آینده ام نمیل که از هیچ نگاه بار دوش شمو شنم؛^{۲۷} د حقیقت مسیح که د وجود ازمه آسته قسم مخورم که دمی باره افتخار مره د منطقه های آخیا هیچ کس از مه گرفته نمیشه.^{۲۸} چرا؟ آیا بخاطری که شمو ره دوست ندرم؟ خدا میدنه که شمو ره دوست درم.

^{۲۹} ولے کاری ره که فعلاً مونم، ادامه دده مورم تا فرصت ره از نفرای فرصت طلب بگیرم، از کسای که د تلاش آسته تا خودون ره د وسیله چیزی که د بله شی افتخار مونه قد ازمو برابر کنه.^{۳۰} چون امی رقم آدما رسولای دروغی و خدمتگارای فریبکار آسته که ظاهر خو ره رقم رسولای مسیح جور مونه.^{۳۱} ای یگ چیز عجیب نیسته، چون خود شیطو ام خود ره رقم ملایکه نور جور مونه.^{۳۲} پس ای یگ گپ کله نیمه که خدمتگارای شیطو ام ظاهر

خُوره رقم خِدمتگارای عدالت جور کُنه. عاقبت ازوا مُطابق اعمال ازوا سَنْجِيده مُوشہ.

پولس دَبَلَه رَجَه هَای خُو إِفتخار مُونه

^{١٦} بسم مُوكیم، هیچ کس مَرَه لَوْدَه فِکر نَكْنَه؛ ولے اگه مُونید، پس مَرَه بَحِيثِ یگ لَوْدَه قبُول گُنید تا ما ام کَمَك وَرَى دَبَلَه خُو إِفتخار كُنم. ^{١٧} چیزی ره که امی رقم قد إِطمینان پُرافتخار مُوكیم از طرف مَولا نَمُوكیم، بلکه مِثِل یگ لَوْدَه مُوكیم. ^{١٨} ازی که غَدر کسا مُطابق راه-و-رسِم جِسم إِفتخار مُونه، ما ام إِفتخار مُونم. ^{١٩} چُون شُمو آدمای لَوْدَه ره دَخوشی تَحَمُل مُونید، چراکه خودون شُمو دانا آستید. ^{٢٠} ذِحقیقت شُمو کسای ره تَحَمُل مُونید که شُمو ره غُلام جور کُنه، يا شُمو ره غارت کُنه، يا از شُمو فایده-کشی کُنه، يا خود ره از شُمو کده باله بِدَنه و يا قد چپات د رُوي شُمو بِزَنه. ^{٢١} قد شِرمنَدگی إِقرار مُونم که مو دَمزی کارا کَلو ضعیف بُودے.

لیکن اگه کُدم کس جُرات مُونه که د باره یگو چیز إِفتخار کُنه - ما مِثِل یگ لَوْدَه توره مُوكیم - ما ام جُرات مُونم که إِفتخار کُنم. ^{٢٢} آیا اُونا عِبرانی آسته؟ ما ام آستم. آیا اُونا إِسرائیلی آسته؟ ما ام آستم. آیا اُونا أولاً دِه إِبراهیم آسته؟ ما ام آستم. ^{٢٣} آیا اُونا خِدمتگارای مسیح آسته؟ - ما رقم یگ دیونه توره مُوكیم - ما کَلوَتَر آستم: ما سختَر زَحمَت کشیدیم، کَلوَتَر بَندی شُدیم، بے حساب لَت خوردیم و بارهَا د خطرِ مَرَگ قرار گِرفتیم. ^{٢٤} پَنج دفعه از دست یهودیا قَمَچی خوردم، هر دفعه یگ کم چِل قَمَچی. ^{٢٥} سِه دفعه قد چوب لَت خوردم، یگ دفعه سنگسار شُدم، سِه دفعه ام کِشتی مه مَیده شُد؛ یگ شاو و روز ره د دریا تیر کُدم. ^{٢٦} دائم د سَفَر بُودیم، خطر از هر سُو بُود: خطر از دریاچه ها، خطر از دُزا، خطر از قومای خود مه، خطر از مردمای غَير یهود؛ خطر د شار، خطر د بیابو، خطر د دریا و خطر از بِرارون دروغی. ^{٢٧} د زَحَمتا و سختیا بُودیم، د بے خاوي های کَلو و د گُشنَگی و تُشنَگی؛ بارها بِدون خوراک و د یَخی و لُچی تیر کدیم. ^{٢٨} علاوه امی چیزای ظاهري، فِشاری که هر روزه د بَلَه مه مییه، تشویش د باره تمام جماعت های ایماندارا آسته. ^{٢٩} آیا وختیکه یگ شُمو ضعیف شُنه، ما ام قد شی قتی ضعیف نَمُوشم؟ يا وختیکه یگ شُمو بِلَخَشَه، ما دَر نَمِيگِيرم؟ ^{٣٠} اگه ما باید إِفتخار کُنم، د بَلَه چیزای إِفتخار مُونم که ضعیفی مَرَه نِشو مِیدیه. ^{٣١} خُدا، آته مَولا مَوْعيسي که تا آبد قابل سِتایش آسته، مُوفاکه که ما دروغ نَمُوكیم. ^{٣٢} د دَمِشق، والی که تابع حارث پادشاه بُود، پَیرَدارا ره د شار دَمِشق مُقرر کُدد که مَرَه دِستگیر کُنه، ^{٣٣} لیکن ما دَمِنه یگ سَبَد از کِلکینی که د دیوال شار بُود تاه ایشته شُدم و از دست اُزو دُوتا کُدم.

^۱ لازم آسته که افتخار کنم، اگرچه فایده ندره، لیکن ادامه دده د باره رویا ها و مُکاشِفه های که مولا دده، توره مُوگیم.^۲ ما یک آدم ره د جماعت مسیح مینخشم که چارده سال پیش تا آسمون سوم ای که د جسم بُرد شد یا بُرو از جسم، ما نمیدَنم، خُدا میدَنه.^۳ و ما میدَنم که امی آدم یا د جسم یا بُرو از جسم، ما نمیدَنم، خُدا میدَنه،^۴ د بیهشت بُرد شد و تورای ره شنید که گفته نموده، تورای ره که بلده انسان اجازه نییه که نقل کنه.^۵ ما د بله امزی رقم آدم افتخار مُونم، ولے د بله خود خُو، جُز د بله ضعیفی های خُو د دیگه چیز افتخار نمُونم.^۶ چون اگه بخایم افتخار کنم، بلده مه لودگی نیسته، چراکه حقیقت ره مُوگیم. لیکن ازی کار خودداری مُونم، تا هیچ کس مره از چیزی که دز مه مینگره یا از مه میشتوه، بالهتر فکر نکنه.^۷ و بلده ازی که بخاطر امزُو مُکاشِفه های فوق العاده مغُرور نشتم، جسم مه گرفتار یگ میخک شد، یعنی گرفتار قاصد شیطو تا مره عذاب کنه و ما غُرور پیدا نکنم.^۸ سه دفعه از مولا د باره شی درخاست کدم که او ره از مه دور کنه،^۹ مگم مولا دز مه گفت: "فیض مه بلده تو بس آسته، چون قُدرت مه د ضعیفی تُو کامل مُوشه."^{۱۰} امزی خاطر قد خوشی کلو د بله ضعیفی های خُو افتخار مُونم تا قوت مسیح د وجود مه جای بگیره.^{۱۱} پس ما د ضعیفی ها، رسوایی ها، سختیا، آزار-و-آذیت ها و مشکلاتا بخاطر مسیح خوشحال آستم، چون وختیکه ضعیف آستم، اموغیت قوی آستم.

تشویش پولس د باره ایمانداری قرنثیس

^{۱۱} ما لوده جور شدیم! شمو مره محبور کدید که امی رقم شتم! د حقیقت شمو باید مره تعريف-و-توصیف مُوكدید، چراکه ما از رسولای فوق العاده کده از هیچ نگاه کم نیستم، اگرچه هیچ آستم.^{۱۲} یقیناً، شمو نشانی های یگ رسول ره د مینکل خُو دیدید وختیکه مُعجزه ها، چیزای عجیب و کارای پُر قُدرت قد صیر کامل د وسیله ازمه ظاهر شد.^{۱۳} د کدم چیز شمو از دیگه جماعت های ایماندارا کده کم حساب شدید، بعیر امزی که ما بار دوش شمو نشدم؟^{۱۴} بخاطر امزی بـ انصافی مره بـ بخشید!^{۱۵} اینه، دفعه سوم ما تیار آستم که د پیش شمو بییم؛ و بار دوش شمو نمُوشم، چراکه ما مال-و-دولت شمو ره نه، بلکه خودون شمو ره بـ بخایم. چون بچیچا نباید بلده آته-و-آبه خُو پس انداز کنه، بلکه آته-و-آبه باید بلده بـ بچیچای خُو پس انداز کنه.^{۱۶} ما قد خوشی کلو مصرف مُونم و بلده جان های شمو مصرف مُوشم. اگه ما شمو ره کلو دوست درم، آیا شمو باید مره کمتر دوست داشته بشید؟^{۱۷} بـ بیلید که بـ کی، ما بار دوش شمو نبُودم، ولے د عین حال شمو مُوگید، ازی که ما چالاک بُودم، شمو ره بازی دده د چنگ آوردم.^{۱۸} آیا د وسیله امزُو کسای که د پیش شمو ری کدم، از شمو فایده کشی کدم؟^{۱۹} ما از تیئس خاھش کدم که د پیش از شمو

بیبه و امو باره ام قد شی رئی کدم. آیا تیس از شمو فایده کشی کد؟ آیا مو د هدایت یگ روح رفتار نکدی و
یگ راه-و-روش ره پیش نگرفتی؟

^{۱۹} آیا تا آلی ره فکر موکدید که مو د برابر شمو از خود دفاع مونی ؟ نه، مو د وسیله مسیح د حضور خدا توره
موگی. آی عزیزا، هر چیزی که مو انجام میدی، بخاطر آباد کدون شمو استه. ^{۲۰} چون ترس مخوازم که وختی د
اونجی بییم، شمو ره رقمی بنگرم که نیخایم و شمو ام مره امو رقم بنگرد که نیخاهید. ما میترسم که د اونجی
جنگ-و-جنجال، حسادت، خشم-و-قار، خودخاهی، تهمت، غیبت، غرور و بے نظمی بشه. ^{۲۱} ما میترسم که وختی د
دُوباره بییم، خدای مه مره د پیش شمو فروتن کنه و ما بلده غدر کسای که د گذشته گناه کده، ولے از ناپاکی،
زنگاری و فیق-و-فسادی که مرتکب شده، توبه نکده، ماتم بگیرم.

^{۱۳} ای دفعه سوم آسته که د پیش شمو مییم. نوشتہ شده که: "هر قضیه باید د وسیله شاهدی دو یا سه شاهد
ثابت شنه." ^۲ ما پیش ازی وختیکه دفعه دوم قد شمو بودم، گفتم و آلی ام که از شمو دور آستم پیش از پیش موگم
که اگه دُوباره بییم د برابر کسای که د گذشته گناه کده و د برابر تمام کسای دیگه که گناه مونه گذشت نمودنم،
^۳ چون شمو ثبوت میخاهید که مسیح د وسیله ازمه توره موگیه. او د رابطه خو قد شمو ضعیف نیسته، بلکه د
 وجود شمو قدرتمند استه. ^۴ چون اگرچه او د ضعیفی د صلیب میخوب شد، ولے قد قدرت خدا زندگی مونه. امی
 رقم مو ام قد ازو ضعیف آستی، مگ د وسیله قدرت خدا قد ازو زندگی مونی تا دز شمو خدمت کنی.

^۵ خود ره آزمایش کنید تا بنگرد که د ایمان آستید یا نه. آرے، خود ره امتحان کنید. آیا شمو تمیدنید که عیسی
مسیح دز شمو آسته؟ سوای که د امتحان ناکام مnde بشید! ^۶ امیدوار آستم شمو پی ببرید که مو د امتحان ناکام
نمندی. ^۷ و مو د پیش خدا دعا مونی که شمو هیچ کار بکرد ره انجام ندید؛ نه بلده ازی که مو آدمای تایید شده معلوم
شنبی، بلکه بلده ازی که شمو کار درست ره انجام بیدید، حتی اگه مو د نظر مردم تایید نشده معلوم شنبی. ^۸ چون مو
نمیشنی که هیچ چیز ره د ضد حقیقت انجام بیدی، بلکه فقط بلده حقیقت انجام میدی. ^۹ چون وختیکه مو ضعیف
آستی و شمو قوی آستید، مو خوشی مونکنی. دعای مو امی آسته که شمو د پختگی برسید. ^{۱۰} امزی خاطر ای چیزا
ره د حالیکه از شمو دور آستم نوشتہ مونم تا وختیکه پیش شمو مییم قد شمو د سختی رفتار نکنم. چون قدرت-و-
اختیاری ره که مولا دز مه دده، بلده آباد کدو آسته، نه بلده خراب کدو.

سلام های آخِری

۱۱ د آخر، آی بِرارو، خوش بَشِيد؛ د پُختنگی بِرسِيد؛ د لَگرم بَشِيد، يېگ فِکر بَشِيد و د صُلح-و-صِفا زِندگی کُنید و خُدای مُحبَّت و سلامتی قد شُمو بَشه. ۱۲ يِگدِیگِه خُوره قد رُوي ماخی مُقدَّسانه سلام بُکِيد. ۱۳ پِگ مُقدَّسین دَز شُمو سلام مُوگیه. ۱۴ فيَضِ مَولا عَيسَى مسيح و مُحبَّت خُدا و رفاقتِ روح الْقُدُس نصِيبِ پِگ شُمو شُنه. آمين.